

დამფუძნებელ კრების საპროპაგანდო კომისიის გამოცემა.

6

ნ. ხომერიკი

საქართველოს ბუნებრივი სიმდიდრე

ტფილისი
დამფუძნებელი კრების სტამბა
1920

დამფუძნებელ კრების საპროპაგანდო კომისიის გამოცემა.

6

ნ. ხომერიკი

საქართველოს ბუნებრივი სიმდიდრე

ტფილისი
დამფუძნებელი კრების სტამბა
1920

საქართველოს ბუნებრივი სიმდიდრე

შესავალი.

როცა 1918 წლის 26 მაისს გამოცხადდა საქართველოს დამოუკიდებლობა, ბევრი ეჭვობდა, რომ ჩვენი პატარა რესპუბლიკა ამ საშინელ ისტორიულ ქართვეილს გადაიტანდა და ფეხზე დადგებოდა. მარა უკვე ორ წელიწადზე მეტია, რაც ფაქტიურათ საქართველოს რესპუბლიკა არსებობს. დიდი გაჭირვება და ავი დრო გამოიარა მან ამ ხნის განმავლობაში. აუარაცხელი დაბრკოლება ელობებოდა წინ, ბევრი მტერი ყავდა როგორც შინ, ისე გარეთ. მარა ყოველივე ამას სძლია პატარა ქვეყანამ, მედგრათ გადაიტანა მრავალი განსაცდელი და დღევანდლამლი მოაღწია მთლიანად და უვნებელათ. რა იყო ამის მიზეზი – ამის გარკვევას ჩვენ აქ არ შევუდგებით. აღვნიშნავთ მხოლოდ ფაქტს.

დღეს საქართველოს რესპუბლიკა მთელი განათლებული ქვეყნის მიერ ცნობილია როგორც სრულუფლებიანი წევრი ხალხთა ოჯახისა. ჩვენმა ხალხმაც ამ ხნის განმავლობაში ღრმად შეითვისა იდეა საქართველოს დამოუკიდებლობისა, საჭიროება მისი სახელმწიფოებრივი არსებობისა. ამ უამათ საქართველოს არ სცნობენ და მას ებრძვიან მხოლოდ მისი აშკარა მტრები და თითო-ოროლა გარეწარი. მთელი ხალხი, მთელი დემოკრატია შეჰყრობილია იმ აზრით, რომ რათაც დაუჯდეს, დაიცვას საქართველოს დამოუკიდებლობა, ვინაიდან ამ დამოუკიდებლობის დაცვასთან მჭიდროთ შეკავშირებულია მისი ბედობალი, მისი აწმყო და მომავალი.

ამ საყოველთაო შეგნებისა და დაინტერესების წყალობით ქართველმა ხალხმა პირდაპირ ჯოჯოხეთურ პირობებში არარასაგან შექმნა სახელმწიფო აპარატი, დაამყარა შედარებითი წესრიგი, ქალაქებსა და სოფლებში შემოიღო დემოკრატიული თვითმართველობანი, განახორციელა უდიდესი სოციალური რეფორმები.

ერთი სიტყვით, ქართველმა ხალხმა დაამტკიცა, რომ მას აქვს როგორც სურვილი, ისე უნარი სახელმწიფოს აშენებისა და დამოუკიდებელი ცხოვრების მოწყობის.

მარა შეიძლება გვითხრან: ერთია სურვილი – მერეა შესაძლებლობა. საქართველოს რესპუბლიკას ხანგრძლივი არსებობა არ უწერია. უმთავრესი საბუთი, რომელიც წინათ ხშირათ მოყავდათ, ხოლო აქა-იქ დღესაც გაიგონებთ, ის არის, რომ საქართველო ღარიბი ქვეყანაა და საკუთარი საშვალეებით არსებობა არ შეუძლიაო. ეს მოსაზრება სერიოზული და ანგარიშგასანეცია. თუ ის მართალია, ამკარათ უნდა ვთქვათ, რომ მთელი ჩვენი მოქმედება უნაყოფო ყოფილა.

მართლაც, სახელმწიფოს არსებობის ერთი უმთავრესი პირობა ეკონომიური ცხოვრების მოწესრიგებაა. თუ ამ მხრივ სახელმწიფო ხანგრძლივად კოჭლობს – ის ადრე თუ გვიან აუცილებლად დაიშლება. სახელმწიფო მაშინ არის მტკიცე, თუ მას აქვს საშვალეება დაიკმაყოფილოს ყველა თავისი მოთხოვნილება საკუთარი სიმდიდრით.

ეს რასაკვირველია იმას არ ნიშნავს, რომ მან მარტოდ-მარტო საკუთარი ნაწარმოებით იცხოვროს. პირიქით ჩვენ ვიცით, რომ არც ერთ ქვეყანას არ შეუძლია არსებობა სრულიად განმარტოებით, ცალკე, თუ სხვა ქვეყნებთან არ გააბა ეკონომიური და სააღებმიცემო ურთიერთობა. ქვეყნათ არ არსებობს ისეთი სახელმწიფო, რომელიც მარტო საკუთარი ნაწარმოებით იკმაყოფილებდეს ყველა თავის მოთხოვნილებებს. ახალდელი ომის დროსაც კი მტრის მიერ გარემოცული გერმანია ახერხებდა სხვა და სხვა საშვალეებით უცხოეთიდან საქონლის მიღებას. თუ დაბოლოს გერმანიას მაინც სძლიეს მოპირდაპირე ქვეყნებმა სწორეთ იმიტომ, რომ ის ჩაკეტეს და მოუს-

შესაშვალემა საკმაო რაოდენობით მიეღო გარეშე ქვეყნებიდან საჭირო საქონელი.

ჩვენ დღეს ბევრ თავის მოთხოვნილებას ვიკმაყოფილებთ ცხრა მთას იქიდან მოტანილი ნაწარმოებით: ხშირათ ვჭამთ კანადის პურს, ვიცვამთ ამერიკიდან მოტანილ ტანსაცმელს, ავადმყოფებს ვაქიმობთ გერმანიაში დამზადებული წამლებით და სხვ. არ არის ისეთი ქვეყანა, რომელთანაც პირდაპირ თუ არა პირდაპირ რაიმე ეკონომიური კავშირი არ გვქონდეს.

მთელი დედამიწის ზურგი წარმოადგენს ერთს მთლიან ეკონომიურ სხეულს, რომლის ცალკე ნაწილს არ შეუძლია არსებობა, თუ მონყვეტილი დარჩა მთელისაგან. უფრო მარტივათ, რომ ვთქვათ, მთელი ქვეყანა ერთი სახელოსნოა, სადაც მზადდება აურაცხელი ნაწარმოები, რომელიც შემდეგ ცოტათ თუ ბევრათ სისწორით ნაწილდება ყველას შორის. მარა ნაწილდება, რასაკვირველია, გაცვლა-გამოცვლის საფუძველზე. ე. ი. უცვლიან იმას, ვისაც სამაგიერო აქვს მისაცემი. ჩვენი ქვეყანაც დღეს ამ საერთო სააღებმიცემო ურთიერთობაშია ჩაბმული. კითხვა იბადება შეუძლია თუ არა მას დაიკმაყოფილოს თავისი მოთხოვნილება, მოიზიდოს უცხოეთიდან საჭირო საგნები და ღირებულებანი და მისცეს მას სამაგიერო საქონელი. თავის თავად ცხადია, რომ ქვეყანა, რომელიც მუდამ მათხოვრობს, ე. ი. სხვას ართმევს, სხვისგან თხოულობს და თითონ კი ვერაფერს აძლევს, – ასეთი ქვეყანა დიდხანს ვერ იარსებებს, ის მალე დაუძღურდება და დაკარგავს თავის დამოუკიდებლობას. ამიტომ სახელმწიფოს ცხოვრებაში ეკონომიურ მომენტს, მეურნეობის მოწესრიგების საკითხს გადამწყვეტი მნიშვნელობა აქვს.

როგორც ვთქვით, ჩვენი დამოუკიდებლობა უბრალო -ჩხირკედელაობათ უნდა ჩაითვალოს, თუ აღმოჩნდება, რომ არ შეგვწევს ძალა გამოვნახოთ საკუთარი საშვალებანი და დავიკმაყოფილოთ ჩვენი ნივთიერი და კულტურული მოთხოვნილებანი.

ამ უამათ საქართველოს რესპუბლიკის წინაშე ყველაზე უფრო მწვავეთ ეს საკითხი სდგას. ეკონომიური ცხოვრების მოუწესრიგებლობას ჩვენ ვგრძობთ თითოეული ფეხის ნაბიჯზე, ცხოვრების ყველა დარ-

გში.

რუსეთის მთავრობამ მეტად ცუდი მემკვიდრეობა დაგვიტოვა. ის აქ აწარმოებდა ჩვენი კუთხის დასუსტების პოლიტიკას, სდევნიდა ხალხის თვითმოქმედობას – თაოსნობას, ხელს უშლიდა ადგილობრივ მრეწველობის განვითარებას და ტყვილა-უბრალოდ ფლანგავდა აუარებელ სიმდიდრეს. ასეთი პოლიტიკის შედეგია, რომ ჩვენი ქვეყანა დღეს ჩამორჩენილი და ღარიბი ქვეყანაა.

ამიტომ ჩვენ იძულებული ვართ თითქმის ყველაფერი უცხოეთიდან შემოვიტანოთ; ნემსი და ძაფიც კი უნდა იქიდან მივიღოთ. ამიტომ ჩვენი სავაჭრო ბალანსი უარყოფითია, ე. ი. ჩვენ მეტი შემოგვაქვს, ვინემ გაგვაქვს, ჩვენ სხვა ქვეყნების ვალი გვედება. ამის შედეგი, სხვათა შორის, ის არის, რომ საშინლად ეცემა ჩვენი ბონების კურსი და უარესდება რესპუბლიკის ფინანსიური მდგომარეობა. ბონების კურსის დაცემა კი იწვევს შიგნით ცხოვრების საშინელ გაძვირებას, მუშათა მდგომარეობის გაუარესებას, მრეწველობისა და ადგილობრივი მრეწველობის შეფერხებას, ერთი სიტყვით, მთელი ეკონომიური ცხოვრების არევა-დარევას.

საკითხავია – დროებითია ეს მოვლენა, თუ ის აუცილებელი და მუდმივია?.

საერთაშორისო ომმა დიდი ქვეყნების ეკონომიური მდგომარეობაც კი ძირიანბუდიანათ შეარყია. რაღა გასაკვირველია თუ ახლად აღორძინებული სახელმწიფო კრიზისს განიცდის. ეს ასეც უნდა იყოსო – იტყვიან. და არც მთლად მტყუანი იქნებიან.

მარა შეიძლება ჩვენი გაჭირვებული მდგომარეობა მართო საერთო არევა-დარევისა და დაცემის შედეგი არ არის? შეიძლება საქართველო ნორმალურ დროშიაც მოკლებული იქნება საშვალეებს გამოასწოროს თავისი მდგომარეობა და მოაწესრიგოს ეკონომიური მდგომარეობა?

ეს კითხვა კარგათ უნდა გაითვალისწინოს ყველა-მუშამ, ყველა გლეხმა, ყველა მოქალაქემ, ვინაიდან სახელმწიფოს აშენებს დღეს არა ერთი და ორი კაცი, არა რჩეულნი და თითო-ოროლა პოლიტიკოსი, არამედ მთელი ხალხი, რომელმაც უნდა იცოდეს საით მიდის, რას აკეთებს და როგორ

მომავალს უმზადებს თავის თავს და თავის ქვეყანას.

აქვს თუ არა იმდენი ნივთიერი სახსარი საქართველოს, რომ სხვისი მონა არ გახდეს და საკუთარი ძალით მოაწიოს თავის ცხოვრება? უკეთ, რომ ვთქვათ არსებობს თუ არა საქართველოს რესპუბლიკისთვის შესაძლებლობა ეკონომიური განვითარებისა?

აი, რის გარკვევას ემსახურება ეს პატარა წიგნაკი. საქართველო ღარიბი ქვეყანაა და ასეთაც დარჩება ის შემდეგშიაც – ამბობენ ისინი, ვისაც არ სწამს მისი დამოუკიდებლობა.

საქართველო ღარიბი ქვეყანაა დღეს ვეთანხმებით ჩვენ, – მაგრამ მომავალში ის აუცილებლად ეკონომიურათ უნდა დაწინაურდეს და გამაგრდეს – ვამტკიცებთ ჩვენ.

რატომ?

იმიტომ, რომ მას აქვს დიდძალი ბუნებრივი სიმდიდრე, რომლის თუ გინდა ერთი ნაწილის გამოყენებაც კი სრულიად შესცვლის მის დღევანდელ უმწეო მდგომარეობას და გვერდში ამოუყენებს ეკონომიურად დაწინაურებულ ქვეყნებს.

ჩამოვთვალოთ მოკლეთ ეს სიმდიდრე.

ჩვენი მინა წყალი.

საქართველოს პირველი სიმდიდრე მისი უხვი მინა-წყალია. მართალია, მისი ტერიტორია დიდი არ არის. ის 5 ნახევარ მილიონ დესეტინაზე ცოტა მეტს შეიცავს. ამაში კულტურული მინა, ე. ი. ისეთი, რომელიც გამოდგება სახნავ-სათესავ, სამოსახლოთ, ბაღების მოსაშენებლათ და სათივეებათ მხოლოდ 1.335.751 დესეტინაა.

რევოლიუციამდი საქართველოში სულ 600-650 ათას დესეტინამდი ითესებოდა პურეული მცენარეებით. საკუთარი მოსავალი ჩვენ არ გვეყოფნიდა რამდენიმე მილიონი ფუთი პური ჩრდილო კავკასიიდან შემოგვქონდა. ეს არა იმიტომ, თითქო ჩვენს ქვეყანას არ შეეძლოს საკმაო პურის მოცემა.

სრულებითაც არა!

საქართველოს ნიადაგი მდიდარია და ჰავა მშვენიერი, მარა ამ მდიდარი ნიადაგის დამუშავება ხდე-

ბა ძველის-ძველი წესებით, რაც შრომას უნაყოფოს ხდის და ბუნებას ვერ ვართმევთ იმდენს, რამდენის მოცემაც მას შეუძლია.

პირველათ ყველას დიდათ აფიქრებდა ის გარემოება, რომ ჩვენ მოვწყდით რუსეთს, რომელიც გვაძლევდა პურს. ეგონათ, რომ შიმშილით ამოვწყდებოდით, მაგრამ ამ მოკლე დროის გამოცდილებამაც კი დაგვარწმუნა, რომ ჩვენ შეგვიძლია საკუთარი პურით გამოვკვებოთ ქვეყანა. 1918 წლის მოსავლით ჩვენ იოლათ გავიტანეთ თავი. ასევე იოლათ წავიღოთ 1919 წელსაც, დიდი მოუსავლობა რომ თავს არ დაგვტეხოდა. წელს უკვე საკმაო პური ექნება რესპუბლიკას.

ეს იმას ამტკიცებს, რომ საქართველოს დღესაც-კი შეუძლია საკუთარი პურით თავის დარჩენა.

როგორც ვთქვით, ომამდი ჩვენში ითესებოდა მარტო 600-650 ათასი დეს. მარა არ უნდა დავივიწყოთ ის გარემოება, რომ ჩვენ მოგვეპოება დიდძალი ადგილიები, რომელიც დღეს უქმათ არის გაჩერებული. მრავალი ათასი დესეტინა მინა უჭირავს ჭაობებს, რომელთა ამოშრობა შეიძლება და თვალუწვდენელი მიდვრები უწყლობის გამო მეურნეობისათვის ხელმიუწვდომელია. შავი ზღვის პირის ჭაობები, ყარაიას, შირაქის, ტირიფონას და სხვ. ველები ქვეყნის მორჩენალ ადგილებად გადაიქცევიან, თუ სახელმწიფო მიიღებს სათანადო ზომებს: გასაშრობს – გააშრობს, მოსარწყავს – მორწყავს. გარდა ამისა, ჩვენში მოიპოება ბევრი ტყე დაბლობ ადგილებში, რომელთა გაჩეხა და სამეურნეო ადგილებათ ქცევა ადვილად შეიძლება.

ცხადია, საქართველოს საკმაო მინა-წყალი მოეპოება, რომ საკუთარი მოსავალით ირჩინოს თავი.

მარა ეს კიდევ ცოტაა. ჩვენში სასოფლო მეურნეობა ჩამორჩენილია. მინა მუშავდება მეტად უხეიროთ. სამეურნეო ცოდნა არ არის გავრცელებული და თვით ტექნიკა მინის დამუშავებისა მეტად პრიმიტიულია. ამიტომ საქართველოში მინა შედარებით ძლიერ ცუდ მოსავალს იძლევა.

ჩვენში დესეტინა 50-55 ფუთ პურს იძლევა. დანიაში კი დესეტინაზე 183 ფუთი მოყავთ.

როგორ გგონიათ – დანიაში უკეთესი ნიადაგი

და კლიმატიური პირობებია?

პირიქით, იქაური ნიადაგი გაცილებით უფრო მწირია და ჰავა უარესი. მარა იქ მინას უფრო საზრინათ ამუშავებენ. თუ მივბაძავთ დანინაურებულ ხალხს – და ეს კი ჩვენთვის აუცილებელია – ჩვენი სასოფლო მეურნეობის ნაყოფი ერთი-ორად და მეტად იმატებს და ქვეყანა ნივთიერთ მოლონიერდება.

თამამათ შეიძლება ითქვას, რომ არც ერთ ქვეყანაში არ არის ისეთი საუცხოვო ბუნებრივი პირობები სასოფლო მეურნეობის განვითარებისათვის, როგორც საქართველოში. აქ საჭიროა მხოლოდ ადამიანმა ხელი ამუშაოს და გონება აამოძრავოს, რომ მისი შრომა ერთი ათად დაჯილდოებულ იქნას.

რაციონალური მეურნეობის გავრცელება საქართველოს საშვალეებს მისცემს არა თუ დაირჩინოს თავი საკუთარი ხორბლეულობით, არამედ გასაყიდი პურიც მოიყვანოს. ჩვენ რომ მივბაძოთ სასოფლო მეურნეობის დარგში გერმანიას, ინგლისს, დანიას ან ბელგიას რამდენიმე ათეულ მილიონ ფუტ პურს გავიტანთ უცხოეთის ბაზარზე. და ამას ჩვენ ვიზამთ იმიტომ, რომ ჩვენი ქვეყანა ბუნებით დაჯილდოებულია. ზოგიერთ ხალხს ისეთი მწირი ადგილები უჭირავს, რომ რაც უნდა იშრომოს, ბარაქას მაინც ვერ მოიკიდებს.

ჩვენ კი მართო ხელისა და გონების განძრევა გვესაჭიროება.

საქართველოს უპირატესობა კიდევ იმაში მდგომარეობს, რომ მისი ბუნება მრავალფეროვანია. აქ ერთი კუთხის ნიადაგი და ჰავა მეორისას არ გავს. ეს გარამეობა საშვალეებს იძლევა მრავალნაირი სამეურნეო კულტურის განვითარებისა.

მართლაც, სასოფლო მეურნეობის რომელი დარგი გინდათ რომ ჩვენში არა იხეირებს?

ჰავა და ნიადაგი იცვლება ყოველ ფეხის ნაბიჯზე: ერთ ადგილას რომ ცხელი ქვეყნის მცენარეულობა ხარობს, ცოტა მოშორებით ალპის (მაღალი მთების) მცენარეთა სამეფოს ხვდებით, გაივლით კიდევ ცოტას და ზომიერ ჰავას და მის მცენარეულობას ნახულობთ. ამიტომ ჩვენში ძველთაგანვე მისდევდნენ ვენახის მოშენებას, თამბაქოს თეს-

ვას, მებაბრეშუმეობას, მეცხვარეობას და სხვ. უკანასკნელ დროს ვრცელდება დაფნის, ჩაის, მანდარინის ფორთოხლისა, ზეთის ხილისა და სხვა ძვირფას მცენარეულობის კულტურა. შეიძლება მოშენება მრავალი ტენიკური (სელი, მზისუმზირა, აბუსალათინი და სხვ.) და სამკურნალო (ლენცოფა, ევკალიპტის ხე, კამფარის დაფნა და სხვ.) მცენარეების. მებოსტნეობას და მეხილეობას, ხომ ჩვენში დიდი მომავალი აქვს!

სასოფლო მეურნეობის თითოეული ეს დარგი შეიძლება დიდი შემოსავლის წყაროთ გახდეს და რესპუბლიკის ეკონომიური ცხოვრების გაძლიერებას ხელი შეუწყოს. მრავალი მილიონი და მილიარდი მანეთის საღირალი ნაწარმოების დამზადება შეიძლება როგორც საკუთარი მოთხოვნილების დასაკმაყოფილებლად, ისე უცხოეთში გასატანათ. საუცხოვო ბუნებრივი პირობების გამო საქართველო მომავალში უეჭველათ გადაიქცევა ძვირფას სამეურნეო კულტურის ქვეყანათ. დაუმატეთ ამას მესაქონლეობა, რომელიც ეხლაც დიდ როლს თამაშობს ქვეყნის ეკონომიურ ცხოვრებაში. საქართველოს მოეპოება მილიონ დესეტიმადი საზამთრო და საზაფხულო საძოვრები და ოთხ მილიონამდი წვრილი და სხვილფეხი საქონელი. აქედან ორ მილიონამდი მარტო ცხვარია. როცა მცხოვრებლები დაეჩვევიან მინდვრის მოვლას, საკვებ ბალახებისა და მცენარეების თესვას, საქონლის რაოდენობამ შეიძლება ერთი-ორად იმატოს და მესაქონლეობა ხალხის ნივთიერი კეთილდღეობის ერთ-ერთი თვალსაჩინო წყარო შეიქნეს.

ყველამ იცის, თუ როგორ ჩამორჩენილია სასოფლო მეურნეობა. მიუხედავათ ამისა ომამდი, ე. ი. სანამ ქვეყნის ნვრევა დაიწყებოდა და ნორმალური მდგომარეობა იყო, საქართველოში მილიონ ფუთობით მზადდებოდა თანბაქო, ბოსტნეულობა, ხილი და სხვ.

რალა იქნება მაშინ, როცა ჩვენში მეურნეობის ევროპიული წესები გადმოინერგება, გავრცელდება უმაღლესი ტენიკა და სამეურნეო ცოდნა? აბა, მაშინ გვიმტკიცონ ჭკვიანმა ხალხმა, რომ საქართველო ღარიბი და უძლურია, რომ ჩვენ დამოუკიდებელი არსებობა არ შეგვიძლია და სხვა უნდა გვყა-

დეს ბატონი და პატრონი!

არა, საქართველოს მოეპოვება საშუალება მონყოს თავის ეკონომიური ცხოვრება. მარტო მისი სასოფლო მეურნეობა, მისი მდიდარი და ნოყიერი ნიადაგი და მშვენიერი ჰავა ამის სრული გარანტიაა.

საჭიროა მხოლოდ მიზანშეწონილი შრომა და სწორი პოლიტიკა, რომ ამ გარემოებით სავსებით ვისარგებლოდ და ქვეყანა ეკონომიური წარმატების გზაზე დავაყენოთ.

თუ საქართველო მაინც ღარიბ-ღატაკი დარჩება, ეს მხოლოდ ჩვენი დაუდევრობით შეიძლება მოხდეს.

საქართველოს სასოფლო მეურნეობის ბრწყინვალე მომავალი უეჭველია.

მარა მარტო სასოფლო მეურნეობაში არ არის ჩვენი ეკონომიური მომავალი.

საქართველოს აქვს მეორე რიგის ბუნებრივი სიმდიდრე, რომლის დამუშავება და გამოყენება საფუძვლად უნდა დაედვას მრეწველობის განვითარებას.

ორი უმთავრესი პირობაა საჭირო მრეწველობის ასაღორძინებლად: ნედლი მასალა – მადანი და სათბობი საშუალებანი. ქვეყანას, რომელსაც ეს მოეპოვება, შეუძლია ქონდეს საკუთარი მრეწველობა და დაწინაურდეს, როგორც სამრეწველო ქვეყანა. საქართველოს ერთიკ მოეპოვება და მეორეც. მას აქვს დიდძალი სხვა და სხვა გვარი მადნეულობა და აუარებელი სათბობი მასალა ქვანახშირის სახით.

თუ დღემდე ჩვენში მრეწველობა კოჭლობდა, ეს აიხსნება რუსეთის მთავრობის განსაკუთრებული მოქმედებით, რომელიც პოლიტიკური მოსაზრებით ხელს უშლიდა განაპირა ქვეყნებში ფაბრიკა-ქარხნების დაარსებას და ნედლი მასალის გადამუშავებას.

საქართველოს მადნეულობა.

საქართველო მდიდარია მადნეულობითი რკინის, სპილენძისა და სხვა მადნეულობის დამუშავებას აქ უხსოვარი დროიდან მისდევდენ. ჯერ კიდევ ქრისტეს დაბადებამდე ქართველები ბევრ ოქროსა და ვერცხლს ამუშავებდენ.

მეფე ერეკლეს დროს დიდი მუშაობა სწარმოებდა ახტალის და ალავერდის სამთამადნო რაიონ-

ში (ბორჩალოს მაზრა). ერთ წელიწადს მარტო ახტალის ქარხანაში 92 ფუთი და 23 გირ. ვერცხლი და 15 ათას ფუთამდი სპილენძი იქნა დამუშავებული. რუსეთის დამკვიდრებისას ერთხანს შესწყდა ეს მუშაობა, მაგრამ შემდეგ ალავერდში ისევ განახლდა. ალავერდის ქარხნები ომის დაწყებამდე რამდენიმე ასი ათას ფუთობით ამზადებდნენ სპილენძს.

სპილენძის მადნებით განსაკუთრებით მდიდარია ბათომისა და ართვინის ოლქები. აქ ინგლისელები-სა და სხვა უცხოელების მიერ გაშენებულია დიდი ქარხნები. ას მილიონობით ითვლიან ზოგიერთ ადგილებში მადანის რაოდენობას. ბევრი ადგილი ჯერ აღმოუჩენელია, ბევრი ნიშნები მხოლოდ აღმოჩენილია, მაგრამ გეოლოგიური გამოკვლევა ჯერ კიდევ არ მოუხდენიათ, არ გამოუანგარიშებიათ მადნეულობის რაოდენობა. საერთოდ არ არის ისეთი მაზრა, ისეთი ადგილი, სადაც სპილენძის ნიშნები არ იყოს. ამ ადგილების ჩამოთვლას ჩვენ აქ არ შევუდგებით. ერთი რამ ეჭვს გარეშეა საქართველოს სამთამადნო მრეწველობაში სპილენძის დამუშავება მომავალში საპატიო ადგილს დაიჭერს.

მარა ყველაზე უფრო დაუფასებელ სიმდიდრეს ჩვენთვის **ჭიათურის მარგანეცი** შეადგენს. პირველად ის აქ აღმოაჩინა 1849 წელს უცხოელმა გეოლოგმა აბიხმა. მისი ექსპლოატაცია კი დაიწყო 1878 წლიდან. როცა ის გადმოქონდათ გომის სადგურზე, აქედან რკინის გზით ფოთსა და ბათომში ჩაქონდათ და უცხოეთში იგზავნებოდა. ჭიათურის რკინის გზის შტოს გაყვანის შემდეგ მადანის დამუშავება ძლიერ გაფართოვდა. გაჩნდა მრავალი ფირმა, ჭიათურის მიყრუებულ სოფელს მოაწყდა ბევრი უცხოელი და აღორძინდა დიდი სამრეწველო ცენტრი. თუ პირველათ მთელი წარმოება რაღაც ასი ათასი ფუთით განისაზღვრებოდა, 1906 წელს უკვე 50 მილიონ ფუთზე მეტი მადანი იქნა მაღაროებიდან ამოღებული. საყურადღებოა ის, რომ წარმოება თანდათან მატულობდა და ჭიათურის შავი ქვა უცხოეთის ბაზარს ეპატრონებოდა. ომმა, როგორც ყველაფერ დანარჩენებზე, ისე მარგანეცის წარმოებაზედაც თავისი დამლუპველი გავლენა იქონია. რამდენიმე წლის განმავლობაში წარმოება თითქმის სავსებით გაჩერებუ-

ლი იყო და მხოლოდ ახლა, ევროპასთან მიმოსვლის განახლების გამო, ისევ იწყება გამოცოცხლება. ჯერ-ჯერობით გააქვთ ძველათ დამზადებული ქვა, მარა მალე ის გამოილევა და მალაროებში ცხოვრება ისევ გამოცოცხლდება.

ჭიათურის სამთამადნო რაიონი – 126 კვადრატულ ვერსს შეადგენს. მადანის რაოდენობას სხვა დასხვა მკვლევარნი სხვადასხვანაირათ განსაზღვრვენ. ზოგიერთის აზრით აქ 6-6,5 მილიარდი ფუთი მადანია, სხვების გამოკვლევით კი ის 15 მილიარდამდე აღწევს. დედამიწის ზურგზე ჯერ არსად არ არის აღმოჩენილი ასეთი მდიდარი მალაროები. ბრიტანეთის ინდოეთში, რომელიც ჭიათურის უძლიერეს მეტოქეს წარმოადგენს, მხოლოდ 300-400 მილიონ ფუთს ანგარიშობენ.

მარა ჭიათურის დიდი მნიშვნელობა მართო მადანის რაოდენობაში როდი გამოიხატება. ჭიათურის შავ ქვას უფრო აფასებენ მისი მაღალი ღირსების გამო. ლითონის შემადგენლობა მასში მეტია, ვინემ სხვა მარგანეცში.

მარგანეცი მეტალურგიული წარმოების დედაბოძია. აქედან ცხადია, თუ რა დიდი მნიშვნელობა უნდა ქონდეს ჭიათურას საქართველოს რესპუბლიკისათვის. მისი შემწეობით ჩვენ დაკავშირებული ვართ მთელ ქვეყნიერებასთან.

აი, მაგალითად უკანასკნელი ათი წლის განმავლობაში ჭიათურიდან ყოველ წლიურათ გაუტანიათ:

გერმანიაში	– 16,1 მილ.	ფუთი ანუ	– 48%
ინგლისში	– 9,1	„ „ „	– 25%
ბელგიაში	– 5,0	„ „ „	– 12%
ამერიკაში	– 2,8	„ „ „	– 6%
საფრანგეთში	– 1,9	„ „ „	– 5%
სხვა ქვეყნებში	– 1,7	„ „ „	– 4%

რამდენათაც განვითარდება მრეწველობა, რამდენათაც მეტი ლითონი იქნება საჭირო იმდენათ უფრო გაიზდება ფასი და მნიშვნელობა ჭიათურისა.

თუ რა სისწრაფით მატულობს მარგანეცის ხმარება – ეს იქიდან ჩანს, რომ 1904 წელს მთელ მსოფლიოში დაუმზადებიათ 60 მილიონი ფუთი, ხოლო 9 წლის შემდეგ, ე. ი. 1913 წელს – 125 მი-

ლიონი ფუთი.

აქედან 1904 წ. ჭიათურას მიუცია 47.000.000 ფუთი, ხოლო 1913 წელს – 53 მილ.

ჯერჯერობით ჭიათურის მალაროებიდან ამოღებულია მხოლოდ ნახევარ მილიარდ ფუთზე ცოტა მეტი. ცხადია, რა დიდი როლი ეკუთვნის ჭიათურას საქართველოს ეკონომიურ ცხოვრების აღორძინებაში.

დღემდე ჭიათურა აწვდიდა უცხოეთს გადაუმუშავებელ მადანს; აწვდიდა, მაშასადამე, მცირე ღირებულების საქონელს. მარა, ვინაიდან ჩვენ მოგვეპოება დიდძალი ჰიდრაულიური ენერჯია – მრავალი მდინარე, რომლებიც მოგვცემენ აუარებელ უფასო მამოძრავებელ ძალას, მარგანეცი შეგვიძლია ფერომარგანეცათ ვაქციოთ და უცხოეთის ბაზარზე უფრო მეტი ღირებულების საქონლით გავიდეთ. ამ უამათ ფერომარგანეცს მხოლოდ უცხოეთში ამზადებენ, უმთავრესად ჭიათურის მადნიდან. ომამდე ფუთი მარგანეცი უცხოელებს ფოთიდან 13-14 კაპ. გაქონდათ, ხოლო მისგან გაკეთებული ფერომარგანეცი რუსეთში შემოქონდათ და ფუთს მანეთად ყიდდენ.

აი, რას სწერდა უცხოეთის სპეციალისტი, რომელმაც შეისწავლა ჩვენი მადნეულობა და მდინარეების ძალა:

„არცერთ ქვეყანას არ შეუძლია იმდენი სარგებლის მიღება მარგანეცის გადამუშავებაში, რამდენიც რუსეთის იმპერიას, რომელთაც კავკასიაში (ე. ი. საქართველოში) არის მთლობელი უდიდესი მადნების, რაიც უმთავრესი დამაკმაყოფილებელია მთელი ქვეყნის მომხმარებლებისა“.

თუ ასეთი დიდი მნიშვნელობა ქონდა ევროპიელის თვალში პატარა ჭიათურას უზარმაზარი რუსეთისათვის, რომელსაც სხვა აურაცხელი სიმდიდრე ქონდა, ადვილი წარმოსადგენია, თუ რა დიდ საგანძურს წარმოადგენს ის პატარა საქართველოსათვის.

სხვა რომ არათფერი ქონდეს საქართველოს, მარტო მარგანეცზე შეიძლება აშენდეს მისი სამეურნეო ძლიერება და ეკონომიური განვითარება.

მარა მარგანეცი ჩვენ მარტო ჭიათურაში როდი მოგვეპოება. შავი ქვის ნიშნები, რომელთაც

შეიძლება პრაქტიკული მნიშვნელობა დაურჩეთ, და სადაც შეიძლება მრენველობა გაჩაღდეს, არის ართვინის ოლქში, რაჭაში, სოფელ ჩასავალში, მდინარე ძირულას ხეობაში, თბილისის მაზრაში – სოფელ თეთრი წყაროების მახლობლათ და სხ. ამათში ყველაზე უფრო საყურადღებოა რაჭის მარგანეცი, რომელიც ძლიერ მაღალი ღირსებისაა. თუ გეოლოგიური გამოკვლევა დაამტკიცებს, რომ მადანი აქ ბლომათ მოიპოება, მაშინ შეიძლება რაჭის მიყრუებული სოფ. ჩასავალი მეორე ჭიათურაც გადაიქცეს და ჩვენს ქვეყანას ახალი დიდი სამრეწველო ცენტრი შეემატოს.

მარგანეცის შემდეგ დიდი ყურადღების ღირსია ჩვენი ქვანახშირი – ეს თანამედროვე მრეწველობის აუცილებელი პირობა. ქვანახშირი დღეს მეორე ოქროთ გადაქცეულა ომით დანგრეულ ევროპისათვის. ქვანახშირის ხელში ჩასაგდებათ ხშირათ სახელმწიფოები ერთი მეორეს ეომებიან, ერთმანეთში ქიშპობენ. უქვანახშიროთ შეუძლებელია თანამედროვე განვითარებული სახელმწიფოს არსებობა. ვისაც ის საკმაოდ არ მოეპოება – იგი მუდამ სხვისაგან არის დამოკიდებული და განუწყვეტლივ იმის შიშშია, რომ ერთ მშვენიერ დღეს მოესპობა მისი უცხოეთიდან მიღების საშვალეობა და მოიშლება მთელი ეკონომიური ცხოვრება. ამიტომაც, რომ ასე გაფაციცებით ეძებენ კაპიტალისტური ქვეყნები ქვანახშირის რაიონებს მათზე თვისი გავლენის გასაძლიერებლათ ან პირდაპირ ხელში ჩასაგდებათ.

საქართველო ბუნებას ამ მხრივაც დაუჭილდობია. ჯერჯერობით ჩვენში კარგათ იცნობენ ქვანახშირის ორ დიდ რაიონს: ტყიბულსა და ტყვარჩელს. პირველში უკვე გაჩაღებულია მუშაობა. მთელი წარმოება დღეს აქ საქართველოს ნაციონალურ კუთვნილებას შეადგენს – იგი სახელმწიფოს ხელშია და ტყიბულის მაღაროებიდან ამოღებული ქვანახშირით ამ უამად მოძრაობს ჩვენს რკინის გზებზე ბევრი ორთქმავალი და მუშაობენ სახელოსნოები. ბაქოდან რომ დღეს ნავთის მიღება გაძნელებული არ იყოს, ტყიბულის ქვანახშირი, როგორც სავალიუტო საქონელი, როგორც ისეთი მასალა, რომელზედაც უცხოეთში, განსაკუთრებით იტალიაში,

დიდი მოთხოვნები, შესამჩნევად გამოასწორებდა ჩვენი საგარეო ვაჭრობის საქმეს.

პირველათ ქვანახშირის არსებობა აქ 1830 წელს აღმოაჩინეს.

ტყიბულის ნახშირი ღირსებით ჩამორჩება ინგლისისა და ღონის ბასეინის ქვა-ნახშირს, მარა ის არც ისე მდარე ღირსებისაა, რომ ყურადღების ღირსი არ იყოს. მისი მათბობელი ძალა დამაკმაყოფილებელია, ის – 6576-7525 ადის.

გეოლოგების გამოკვლევით მადანის რაოდენობა 6 მილიარდ ფუტს უდრის. ფიქრობენ, რომ ნამდვილათ მეტი არის. ნახშირის ფენების სისქე 15 საუწნამდი აღწევს, სხვადასხვა ფენის ნახშირი სხვადასხვა ღირსებისაა. რაც უფრო ძირსაა – მით უკეთესია. ზოგიერთი ფენა კოკსს იძლევა. საერთოდ ტყიბულის ნახშირი გამოსადეგია ორთქმავლების ასამუშავებლათ, სახელოსნოებისათვის, ბინების გასათფობათ და სხვ.

უფრო საყურადღებოა ტყვარჩელის ქვანახშირი, სადაც ჯერ კიდევ დამუშავება არ დაწყებულა, ეს ადგილი წინასწარ კარგათ გამოკვლეულია მრავალი სპეციალისტის მიერ და დიდძალი და დიდი ღირსების ქვანახშირის არსებობა აქ ეჭვს გარეშეა. ადგილის უპირატესობა იმაში მდგომარეობს რომ იგი ახლოა შავზღვასთან, ოჩემჩირიდან 35 ვერსზე იმყოფება, ადვილია რკინის გზის გაყვანა და ნახშირის ზღვით უცხოეთში გატანა.

მკვლევართა ანგარიშით აქ 12-13 მილიარდი ფუთი მადანია. ღირსებით ამ ნახშირს სპეციალისტები ინგლისის საუკეთესო ნახშირს ადარებენ. მისი მათბობელი ძალა 8314-8968 უდრის. ნაცრის პროცენტი ძლიერ ცოტაა და ჰაერზე დიდხანს არ იშლება. თითქმის ყველა ფენებიდან კეთდება კოკსი. ამ მხრივ ცდამ მშვენიერი შედეგები მოიტანა. მისგან 68,20% ეგრეთ წოდებული მეტალურგიული კოკსი გამოდის.

ტყვარჩელის ქვანახშირი უცხოეთში გასატანი საქონელი გახდება და მაშასადამე უცხოეთთან აღებ-მიცემობის გასაჩაღებლათ მას დიდი მნიშვნელობა ექნება. არა ნაკლები იქნება მისი როლი შიგნით – მრეწველობის გასაავითარებლად. ჩვენში ახლა

სპილენძის გადადნობა და მომავალში რკინის – საფ-
სებით დამოკიდებულია დონის კოკსისაგან. ტყვარ-
ჩელის გამოყენება ჩვენს ქვეყანას და მის მრეწვე-
ლობას გაათავისუფლებს ამ დამოკიდებულებისაგან
და მისი ქვანახშირი გადაიქცევა მრეწველობის სხვა-
დასხვა დარგის განვითარების ძლიერ ფაქტორათ.

ქვანახშირის არსებობის ნიშნები ბევრ სხვა აღ-
გილასაც მოიპოვება.

საქართველო არც **რკინის მადნეულობით** არის
ღარიბი. რკინის მადანს ჩვენი წინაპარნი უხსოვარი
დროიდან ამუშავებდნენ. ამის ნიშნები მრავალ აღ-
გილს მოიპოვება. ყველაზე უფრო ცნობილი და გა-
მორკვეულია ჩათახის სამთამადნო (ბორჩალოს მამ-
რა) რაიონი. აქ მალაროების ექსპლოატაციას 1862
წლიდან ეწეოდნენ. იყო გაშენებული მადანის დიდი
სადნობი ქარხანა, სადაც ამზადებდნენ კარგა ძალ
თუჯს.

არის აგრეთვე რკინის მადნის სერიოზული ნიშ-
ნები შორაპნისა და რაჭის მაზრებში, აგრეთვე სხვა
ადგილებშიაც.

როგორც ვთქვით, რკინის მადნის დამუშავება
დამოკიდებულია ქვანახშირისა და კოკსის წარმოე-
ბაზე.

ძველი ისტორია იცნობს საქართველოს რო-
გორც **ოქროსა და ვერცხლის** ქვეყანას. ამ ნიადაგ-
ზე შექმნილია მრავალი ლეგენდა. მარა ამ მხრივ
საქართველო ჯერ კიდევ გამოუკვლეველია. ოქროს
არსებობის ნიშნები არის სვანეთში და სხვა ადგი-
ლებშიაც. ოქრო და ვერცხლი მოიპოვება აგრეთვე
შერეული სხვა მადნებთან. ალავერდის სამთამადნო
რაიონში, ვერცხლის მადნის სერიოზული ნიშნე-
ბია დუშეთის მაზრაში, აფხაზეთში, ბათომის ოლქში,
ბორჩალოს მაზრაში და ზოგიერთ სხვა ადგილებში.

აღმოსავლეთ საქართველოში, სოფელ კასპის
მიდამოებში, საქართველოს სამხედრო გზის გასწვრივ
და სენაკის მაზრაში არის დიდძალი **ცემენტის ქვა**.
კირის ქვა ხომ ყოველ ფეხის ნაბიჯზე მოიპოვება.
ბევრია დასავლეთ საქართველოს სხვადასხვა ადგი-
ლას: **ბარიტი**, რომელსაც ომამდი ფართოდ ამუშა-
ვებდნენ.

ხშირად შეხვდებით ჩვენში აგრეთვე **ცეცხლ-**

გამძლე თიხას და თეთრ თიხას (კაოლინს), რომლიდანაც ფაიფურის ჭურჭლეულობა მზადდება.

ცეცხლგამძლე თიხის დამუშავება ჯერ-ჯერობით მხოლოდ სოფელ შორაპანში ხდება, სადაც მონყობილია საკმაოდ დიდი ქარხანა. აგურისა და კრამიტის თიხას კი ბევრ ალაგას ამუშავებენ. ამ მიზნისათვის გამოსადეგი თიხა ყოველ ფეხის ნაბიჯზეა ჩვენში.

დიდ სიმდიდრეს წარმოადგენს აგრეთვე მშვენიერი **ლიტოგრაფიის ქვა**, – რომელიც მრავალ ადგილას მოიპოვება. ლიტოგრაფიის ქვის დიდძალი მადანი არის დუშეთის, ბორჩალოსა და თიანეთის მაზრებში და სხვ.

ყურადღების ღირსია **გლაუბერის მარილი**, რომლის მადანი ორ ადგილას არის აღმოჩენილი: სოფელ მუხროვანში, სადაც უკვე ამუშავებენ და სოფელ მალხაზოვკაში, რომლის რაოდენობა 80 მილ. ფუტს სჭარბობს; გლაუბერის მარილი აუცილებელია შუშეულობის ქარხნებისთვის.

არის ჩვენში აგრეთვე სხვადასხვა **საღებავები, ტორფი** რომელიც კარგ სათბობ მასალას წარმოადგენს, **კიზელგური** (инфузорная земля) და სხვ.

საქართველო არც ნავთის მხრივ არის უიმედო. მრავალ ადგილას მოიპოვება მეტად საყურადღებო ნიშნები ნავთის არსებობისა. მარა ყველაზე უფრო საყურადღებოა გურია და კახეთი. კახეთის ნავთი ხასიათდება ბენზინის, პარაფინის და კეროსინის დიდი შემადგენლობით. ექნება თუ არა ამ ადგილებს სამრეწველო მნიშვნელობა, ე. ი. არის თუ არა იქ იმდენი ნავთი, რომ შესაძლებელი დარჩეს მისი ფართო ექსპლოატაცია, – ეს საკითხი ჯერ არ არის კიდევ გამოკვლეული. ამისთვის საჭიროა დამატებითი გამოკვლევები და სასინჯი მუშაობა, რომელიც ბევრ ადგილას დაწყებული იყო ჩვენში, მარა ომის მიზეზით შეწყდა.

კურორტები და სამკურნალო წყლები.

არსად დედამიწის ზურგზე ასეთ პატარა ტერიტორიაზე იმდენი სააგარაკო ადგილი და სამკურნალო წყლები არ არის, რამდენიც საქართველოშია.

ევროპაში იცნობენ შვეიცარიის, ავსტრიის და სხვა ქვეყნის აგარაკებს; განსაკუთრებით შვეიცარია სახელგანთქმულია თავის კურორტებით. გადამეტებული არ იქნება თუ ვიტყვი, რომ შვეიცარია უმთავრესად კურორტებით ცხოვრობს. იქაურ მონყობილ აგარაკებზე თავს იყრის ყოველწლივ მრავალი ხალხი უცხო სახელმწიფოებიდან, რომელთაც მოაქვთ და სტოვებენ იქ თავის ქვეყნის სიმდიდრის ნაწილს. ამნაირად კურორტები დიდ შემოსავალს აძლევენ სახელმწიფოს და ხალხს და ღარიბ ქვეყანას ამდიდრებენ.

საქართველოს, სხვა სიმდიდრესთან ერთად, ეს სიკეთეც ბლომათ მოეპოება. ჩვენი კურორტები თავისი კლიმატური პირობებით, ადგილმდებარეობით და სიმშვენიერით არა თუ ჩამორჩებიან შვეიცარიის ცნობილ აგარაკებს, მათ კიდევ წაატობებენ. ჩვენი აბასთუმანი ყოველ მხრივ უკეთესია, ვინემ სახელგანთქმული დაოსი. ბორჯომი, გაგრა, უნერა, შოვი, ბახმარო – თქმულა ეს და მრავალი სხვა ასეთი ადგილი სათითაოდ აღებული, ხომ დაუფასებელ განძს შეადგეს. თვით ჩვენი დედა ქალაქი თფილისი, თავისი ძვირფასი გოგირდის აბანოებით და მშრალი ჯანსაღი ჰაერით, რას წარმოადგენს, თუ არ ერთ თვალსაჩინო კურორტს. ჩვენს კურორტებს არ იცნობენ უცხოელები, მხოლოდ იმიტომ, რომ ისინი არ არიან შესაფერად მონყობილი. ბევრ ადგილას მოსავალი გზებიც არ არის.

ჩვენ არ შევუდგებით ცალკე აგარაკების აღწერას. ამას მთელი წიგნი დასჭირდებოდა, ვიტყვით მხოლოდ, რომ მონყობისა და გალამაზების შემდეგ ბევრი მათგანი მსოფლიო კურორტათ გადაიქცევა. მართლაც, ავიღოთ თუ გინდ ბორჯომი მისი რაიონით, ძვირფასი ტყეებით. მრავალი მინერალური წყლებით და მშვენიერი, პირდაპირ წარმტაცი ადგილმდებარეობით. განა საეჭვოა, რომ ასეთი ყოვლად შემკული ადგილი მთელი ქვეყნის ხალხთა მიმზიდველი იქნება? ან აბასთუმანი, რომელიც ჭლექიანებზე პირდაპირ სასწაულმოქმედებას ახდენს და მთელი წლის განმავლობაში ერთნაირად რგებს ავათმყოფს მისი ცხოველმყოფელი მზე და სუფთა ჰაერი? ან კიდევ გაგრა, როლის რბილი ზღვის ჰავა

ისე ეალერსება და ამშვიდებს დალლილ ადამიანის ნერვებს? გაიყვანეთ მაღლა მთაზე, რომელიც თავზე წამოსწოლია გავრას და თითქო ზღვაში ჩახრჩობას უპირებსო, ფუნიკულიორი და თქვენ სას-ნაულს მოახდენთ: რამოდენიმე წამის განმავლობაში ადამიანი ზღვის თბილ ჰაერიდან ალპის ჰავაში მოხვდება. რომელი ერთი ჩამოვთვალოთ? – განა ბახმარო გურიაში, შოვი რაჭაში, ჩეგოლა სამეგრელოში და ბევრი სხვა ასეთი ადგილები საუცხოო კლიმატიური ადგილები არ იქნებიან, როცა იქ გზა მივა და საცხოვრებელი პირობები შეიქმნება?.

ჩვენი კურორტების პირველი უპირატესობა იმაში გამოიხატება, რომ ხშირად კარგ ჰავასთან ერთად ავთმყოფი სამკურნალო წყლებსაც იქვე პოულობს, ასეთია მაგ. ბორჯომი, აბასთუმანი, ციხიტყვარი, უწერა და სხვები. ამ ადგილებში ავთმყოფი ორნაირ ზეგავლენას განიცდის: კარგი ჰაერისა და სამკურნალო წყლის. ეს კურორტის დიდი, დაუფასებელი უპირატესობაა. მარა საქართველოს კურორტებს აქვთ კიდევ მეორე უპირატესობა, რომელიც მათ დაუფასებელ თვისებას შეადგენს. ეს ის, რომ აქ ჰაერი და ადგილმდებარეობა თითქმის ყოველ ფეხის ნაბიჯზე იცვლება და ავთმყოფისათვის პირობების გამოცვლას ადვილ შესაძლებლად ხდის.

ავილოთ იგივე ბორჯომი და მისი რაიონი.

თვით ბორჯომში ჰავა ზომიერია: ცოტა ზევით – ნალვერში უფრო მშრალი ჰაერია. გაივლით კიდევ რამოდენიმე მანძილს და ბაკურიანში სუბ-ალპის ბუნებასა და ჰავას ხვდებით, ახვალთ ცხრა-წყაროზე და უკვე ალპის კლიმატიურ პირობებში იმყოფებით. რალაც ერთი ორი საათის სასიარულოზე ავთმყოფს საშუალება ეძლევა ერთი კლიმატიურ პირობიდან მეორე კლიმატიურ პირობაში მოხვდეს. თვით სხვადასხვა კურორტები ისე ახლოს არიან ერთი მეორეზე, რომ მათი გამოცვლა შედარებით ადვილია. ეს გარემოება საშუალებას აძლევს ავთმყოფს ერთი ადგილიდან მეორეზე ნაკლები დავიდარებით გადავიდეს და ექიმობის მთელი კურსი ადვილათ შეასრულოს. სხვაგან ამისათვის ხშირათ საჭიროა ქვეყნის ერთი კუთხიდან მეორეში გადასვლა, ერთი სახელმწიფოდან მეორეში გამგზავრება, რაც შეკავშირე-

ბულია ბევრ ხარჯსა და უხერხულობასთან. აქ კი თვით ბუნებას ყველაფერი ეს ასე გაუადვილებია.

ხსენებულ თვისებების გამო საქართველოს კურორტებს დიდი მომავალი აქვთ, დროთა განმავლობაში საქართველო მეორე შვეიცარიათ უნდა გადაიქცეს, მხოლოდ ის უფრო კოხტა, მდიდარი და ორიგინალური იქნება. ამიტომ კურორტების მონაცობის საკითხს სერიოზული ყურადღება უნდა მიექცეს. ეს დიდი განძი ჩვენ უნდა გამოვიყენოთ ხალხისა და სახელმწიფოს კეთილდღეობისათვის. ამას ორნაირი მნიშვნელობა ექნება ჩვენთვის: ის ხელს შეუწყობს ხალხის ფიზიკურათ გაჯანსაღებას, ხოლო მეორე მხრივ ჩვენი კურორტები, მიიზიდავენ რამრავალ უცხოელს, გადაიქცევიან შემოსავლის დიდ წყაროთ და ამნაირათ ეკონომიური აღორძინების ერთ-ერთ ფაქტორათ გახდებიან.

განსაკუთრებული ყურადღების ღირსია აგრეთვე ჩვენი **მინერალური წყლები**.

მარტო თბილისის გუბ. ასამდი მინერალური წყარო ითვლება, ხოლო ქუთაისისაში – 60-ზე მეტი. ბევრი წყლები ჯერ კიდევ უცნობია. მარტო რაჭაში და სვანეთში უთვალავი წყლებია. თავისი ფიზიკური და ქიმიური თვისებებით ეს წყლები დიდად განირჩევიან ერთი-მეორისაგან. ზოგი მათგანი, როგორც სამკურნალო საშუალებანი, შეიძლება ორნაირად გამოვიყენოთ. ადგილობრივ სამკურნალოთ საბანაოთ ან სასმელათ და სხვაგან წასაღებათ. ასეთია, მაგალითად, ბორჯომის წყალი. იმით აქიმობენ ავთამყოფები თვით ბორჯომში, მარა გარდა ამისა, ის ისხმება ბოთლებში და შემდეგ მთელ დედამიწის ზურგს ეფინება, როგორც ბევრი ავთამყოფობის საწინააღმდეგო საშუალება. თუ რამდენათ სახელგანთქმულია ამ მხრივ ბორჯომის წყალი – ეს იქიდან ჩანს, რომ 1914 წ. განზრახული იყო 14 მილიონი ბოთლი წყლის ჩამოსხმა. იგი ბლომათ ვრცელდებოდა რუსეთში, ევროპასა და ამერიკაში. ომმა შეაფერხა წყლის ექსპორტი, მარა ახლა ისევ ახლდება და ბორჯომის წყალი, როგორც მშვენიერი სამკურნალო საშუალება, კვლავ მონახავს თავის მომხმარებელს.

მარა ამ მხრივ მარტო ბორჯომის წყალი როდია საინტერესო. წყალტუბოს ე. წ. „კუჭის წყა-

ლი“, უწერისა და ლაშხეთის (სვანეთი) სოდიანი წყლები, კობის (დუშეთის მაზრა) ნარზანი, წალვერის რკინის წყალი, ახალციხისა და მცხეთის კუჭის სანმენდი წყლები და მრავალი სხვა ასეთი სამკურნალო წყლები შეიძლება და უეჭველად უნდა გახდენ ექსპორტის საგნათ. ისინი ბაზარს ადვილათ მოიპოვებენ და დიდი გასაუვალიც ექნებათ. ამ ნიადაგზე მრეწველობის მთელი დარგი აღორძინდება და საქართველო სამკურნალო წყლების ლაბორატორიათ გადაიქცევა.

როგორც ვთქვით, სამკურნალო წყლები ჩვენში ბევრ ადგილას არის, მარა მათში ყველაზე უფრო საინტერესო შემდეგი წყლებითა:

წყალტუბოს თბილი აბანოები, რომლების ტემპერატურა 30-40 გრადუსამდე აღწევს, ხოლო საერთო რაოდენობა ყველა წყაროების დღე და ღამეში მილიონ ვედრამდე აღის. დამტკიცებულია, რომ წყალტუბოს წყლებში რადი ურევია. მათი რადიაციურობა 3-7 უდრის. მიუხედავად ცუდი გზისა და მოუწყობლობის, ყოველ წლივ აქ 40 ათასი კაცი დადის.

ახტალის ტალახი, რომელიც საუცხოო საშვალეება რევმატიზმის წინააღმდეგ. მისი რაოდენობა 10 მილიონ ვედრას უდრის.

აბასთუმანის ცხელი წყლები, რომელთა ტემპერატურა 48 გრადუსს სჭარბობს.

გოგირდის წყლის აბანო, ციხიჯვარში, ბაკურიანის ახლოს.

უწერას მუავე წყალი, კუჭის ავადმყოფობის წინააღმდეგ. ამავე ტიპის არის ლაშხეთის მუავე წყალი, ხოლო განსხვავდება იმით, რომ ამ უკანასკნელში მეტია გაზი და წყაროც გაცილებით უფრო ძლიერია. საუცხოო ადგილმდებარეობა და გარშემო ნაძვნარი, ამ ადგილს, როგორც აგარაკს, დიდ მომავალს უქადის.

კობის (დუშეთის მაზრა) წყლები ნარზანის ტიპისაა. ეს წყლები ხასიათდება გაზის ძლიერი შემადგენლობით და დიდი დებეტით. ზოგიერთი წყაროები იმდენათ მძლავრია, რომ წისქვილს დაატრიალებს.

აღარ გავაგრძელებთ კიდევ სხვების ჩამოთვლას. ისედაც ცხადია, თუ როგორ მდიდარია საქართველო

სამკურნალო წყლებით, თუმცა ჩვენ ჯერ შეიძლება იმის მეთადი არ ვიცით, რაც ნამდვილათ არის.

საერთოდ უნდა ითქვას, რომ საქართველოს ბუნებრივი სიმდიდრე ჯერ კიდევ შეუსწავლელია. ცნობები, რომელიც ჩვენ ამ დარგში მოგვეპოვება, უმეტეს ნაწილათ არა სრული და შემთხვევითი ხასიათის არის. ბევრ ადგილს მკვლევარის თვალი ჯერ კიდევ სრულებით არ უნახავს. ამიტომ რაც ვიცით საქართველოს ბუნებრივ სიმდიდრეზე, ეს სრული არ არის.

საქართველოს ტყეები.

როცა საქართველოს თვალსაჩინო სიმდიდრეზე ვლაპარაკობთ, არ შეიძლება დავივიწყოთ მისი ძვირფასი ტყეები.

საქართველოს მთელი ტერიტორიის ერთი მესამედი ტყეს უჭირავს. ზოგან ტყით დაფარული ტერიტორია სჭარბობს დანარჩენ ადგილებს. ასეთია, მაგალითად, თელავის მაზრა აღმოსავლეთსა და შორაპნის მაზრა დასავლეთ საქართველოში.

ეს ტყეები იცავენ ჩვენს მთავორიან ქვეყანას ნიაღვარისა და წყლების წალეკვისაგან; წვიმების დროს ისინი იძლევიან მდინარეების სათავეს და გვალვის დროს უნახავენ მას საჭირო წყალს. ტყე ჩვენი ხალხის თითქმის ერთადერთ სათბობ და საშენებელ მასალას წარმოადგენს. მარა მართო ამით არ განისაზღვრება ტყის მნიშვნელობა. **საქართველოს ტყეები შეიძლება გახდენ სხვილი მრეწველობის საგნათ.** ეს ტყეები შეიცავენ მრავალ ძვირფას მასალას, რომლის დიდი ნაწილი დღეს მოუხმარებლათ ფუჭდება. უგზობისა და ტექნიკის განუვითარებლობის გამო ბევრი ძველი ტყე უქმათ არის გაჩერებული და ხეები ღუპება.

ევროპის ქვეყნებში ტყე თანდათან ილევა და მაშასადამე მისი მოთხოვნილება უცხოეთის ბაზარზე მატულობს. 5 წლის გამანადგურებელი ომის შემდეგ ეს მოთხოვნილება ხომ კიდევ უფრო გაიზარდა. ამ პირობებში ჩვენს ტყეს დიდი ფასი ედება. საჭიროა მხოლოდ მისი დამუშავება და ბაზარზე გატანა.

საქართველოს ტყეები მართო სივრცით და მა-

სალის სიმრავლით როდია საინტერესო. ეს ტყეები უმეტეს ნაწილათ ძვირფასი ჯიშის ხეებისაგან შესდგება. ჩვენში (შავი ზღვის პირათ) ბლომათ შეხვდებით ბზას, რომელიც სხვაგან თითქმის არსად მოიპოვება ამ უამად. ალაგ-ალაგ არის ნაბლი, ურთხელა, მუხა და სხვა. ძლიერ საინტერესოა აგრეთვე ე. წ. **რეზონანსის ტყე**, რომლისგან კეთდება ძვირფასი ინსტრუმენტები (როიალები, სკრიპკები და სხ.) და რომელიც საკმაო ბლომათ მოიპოვება ბორჯომის რაიონში, სვანეთისა და რაჭის სატყეოებში და სხვაგან. ბევრია ჩვენში წიფელა, რომელსაც სამწუხაროთ ჯერ კიდევ მარტო შემათ ხმარობენ, მარა უცხოეთში მისგან აკეთებენ ძვირფას გრებილ ავეჯეულობას. საქართველოს მდიდარ წიფლის ტყეებს შეეძლო ამ მხრივ მთელი ქვეყნის მოთხოვნილებათა დაკმაყოფილება, რომ მათი რაციონალური გამოყენება სწარმოებდეს. ჩვენს ტყეებს წლიურად 5 მილიონ კუბიკურ ფუტზე მეტი მასალის მცემა შეუძლია.

ამ მასალის რაციონალური დამუშავება რომ ხდებოდეს, ჩვენში მოეწყობოდა ქალაქის წარმოება, გრებილი ავეჯეულობის კეთება, ხის ნარჩენების ქიმიური გადამუშავება ზოგიერთი ნამლების მისაღებათ, სკიპიდარის, კანიფოლის და ფისის ბლომათ დამზადება და სხ. და სხვ.

ჩამოვთვალოთ ზოგიერთი საყურადღებო სატყეო აგარაკები:

1. **გაგრის სატყეო** 14 ათასი დესიატინისაგან შესდგება. სპეციალისტების გამოანგარიშებით ამ ტყეს შეუძლია 40 მილიონი კუბიკი ფუტი საშენებელი მასალის მოცემა. ტყე უტეხია და უმთავრესად ნაძვისა და ფიჭვისაგან შესდგება. ერთ დროს რუს და ფრანგ კაპიტალისტების მიერ განზრახული იყო აქ დიდი წარმოების დანყება. ტყე ზედ ზღვაზე მოღებული და მექანიკური ჩამოსაშვების შემწეობით პირდაპირ ბოლაზში შეიძლება მიტანა.

2. **გაგრის ტყის გაგრძელებას** შეადგენს **აზიბის** ხეობის დიდი ტყე, სივრცით 100 ათას დესიატინაზე მეტი. ამ ტყის ზემო ნაწილი შესდგება წიწვანი ჯიშებისაგან, ხოლო დაბლობში ფურცლიანი ჯიშები სჭარბობენ. გარდა ნაძვისა და ფიჭვის აქ შეხვდებით

წაბლს, ურთხელას და ბზას. უკანასკნელი ამ რაიონში ბლომათ მოიპოება და კარგი ღირსებისაა არის. ზოგიერთების ცნობით აქ ინახება დიამეტრში 6-10 ვერშოკიანი ბზა, რაც მეტად იშვიათ მოვლენას წარმოადგენს. ბზის მიერ დაკავებულ ტერიტორიას ექვსი ათას დესიატინამდი ითვლიან. ეს მეტად დიდ ღირებულებას წარმოადგენს. ნოყიერი ნიადაგის და ზღვის თბილი ჰაერის გამო, ამ რაიონში ხე დიდხანს ძლებს და ძალიან დიდი იზრდება. აქ შეხვდებით საკვირველი სიდიდის ხეებს, რომელთაც 300 წელიწადს კიდევ ზრდა ვერ დაუთავებიათ მაშინ, როცა სხვაგან ჩვეულებრივად 80-100 წელს შემდეგ ტყე გადაბერებას იწყებს.

სამწუხაროთ ასეთი საყურადღებო სატყეო აგარაკი ჯერ კიდევ შესაფერისად გამოკვლეული და მონაცობილი არ არის.

3. შემდეგ ტყის დიდ მასივს ჩვენ ვხვდებით **კოდორის ხეობაში**, რომლის სივრცე 80-90 ათას დესიატინას შეიცავს. აქაც არის ბზა და წაბლი. ბლომათაა მუხა, წიფელა და რცხილა, ზემო ნაწილში სოჭი და ნაძვი.

4. **სვანეთის სატყეო** 90 ათას დესიატინამდე აღწევს. აქედან 70 ათასი დესიატინა ნაძვით, ფიჭვითა და სიუხვით არის დაფარული. აქ არის რეზონანსის ჯიშის ხეები.

5. **ბაღდადის ტყე** წინასწარი გამოკვლევით 55 დესიატინამდი აღის. წაბლი აქაც არის. ბევრია წიფელა, ნაძვი და ფიჭვი. ეს ტყე ცოტათ თუ ბევრათ გამოკვლეულია, ომის დროს აქ რკინის გზის გაყვანას აპირებდნ და პროექტიც არის შედგენილი.

6. **სურების სააგარაკოში** 20-25 ათასი დესიატინა ტყეა. ტყის გამოტანა აქედან შეიძლება მდ. სუფსის შემწობით, რასაკვირველია, კალაპოტის გაწმენდის შემდეგ. ტყე ძველისძველია, უტეხი და მდიდარი მასალით. აქ სხვა ჯიშებს ნაძვი და ფიჭვი სჭარბობს.

7. **ახალციხის რაიონის ტყეების** საერთო სივრცე 120-130 ათას დესიატინამდი აღწევს. ეს ტყეები საკმაო კარგათ არის დაცული. რკინის გზამდი მისი მოტანა შეიძლება მდ. მტკვრით.

8. **საჩხერის სააგარაკო** 35 ათას დესიატინამ-

დი აღწევს. მის ერთ ნაწილს ამ უამათ რკინის გზა ამუშავებს შპალებისა და შეშის დასამზადებლად.

9. **ლენტეხის სააგარაკო**, სივრცით 50 ათასი დესიატინა, უმეტესი ნაწილი ფიჭვისა და ნაძვისაგან შესდგება.

აქვეა რეზონანსის ნაძვი.

10. **ბორჯომის რაიონი**, 42 ათასი დესიატი-ნამდია. ეს ერთად ერთი რაციონალურათ მონყობი-ლი სატყეოა მთელ რესპუბლიკაში. არის გაყვანი-ლი გზები, ცალკე სატყეოები შეერთებულია ერთ-მანეთს შორის ტელეფონით. ტყე აღწერილი და გამოკვლეულია. ტყის ექსპლოატაცია ხდება თანახ-მათ სატყეო ხარჯთ-აღრიცხვის წესებისა. ამიტომ ბორჯომის ტყეები ყოველთვის დიდ შემოსავალს აძლევდენ მაშინ, როცა რესპუბლიკის სხვა ტყეები ან პირდაპირ ზარალს იძლეოდენ, ან და მეტად მცირე სარგებელს. ასე, მაგალითად, ქუთაისის გუბერნიაში 13 კაპეიკი შემოსავალი მოქონდა, ბორჯომის რაი-ონში კი 14 მანათამდი. ამუშავებს ამ ტყეებს თვით სახელმწიფო.

11. **ბათომის ოლქის** ტყე შესდგება უმეტეს ნაწილათ ნაძვის, ფიჭვის, სოჭისა და წიფლისაგან. ალაგ-ალაგ ტყე კარგადაა დაცული, მდიდარია მასა-ლით და ზღვის სიახლოვის გამო დიდ ღირებულე-ბას წარმოადგენს.

არის აგრეთვე სხვა დიდი ტყეები, როგორც, მაგალითად, გომის, ალაზნისა და რაჭის ტყეები, საიდანაც დიდძალი მასალის გამოტანა შეიძლება, მარა ჩამოთვლილი სატყეო აგარაკებიც საკმაო წარ-მოდგენას იძლევიან იმის შესახებ, თუ რა დიდი სიმდიდრის პატრონია საქართველოს რესპუბლიკა და რამდენათ გამოაკეთებს მის ფინანსიურ და ეკონო-მიურ მდგომარეობას ამ სიმდიდრის საზრიანათ მოხ-მარა.

მდინარეების ძალა.

მდინარეებს ჩვენში იყენებენ მხოლოდ მინდ-ვრების მოსარწყავათ. ეს, რასაკვირველია, მათი მე-ტად კარგი თვისებაა: იგი ანოყიერებს მიწას და უზრუნველყოფს მეურნის შრომას კარგი მოსავალით.

მაგრამ მდინარეებს აქვთ მეორე, უფრო დიდი ღირსება, რომელიც ჯერჯერობით თითქმის სრულე-ბით არ არის გამოყენებული. ჩვენ მხედველობაში გვაქვს მდინარის ძალის გამოყენება ელექტრონის ძალის მისაღებად, რომელსაც სხეანაირათ ჰიდრავლი-ურ ძალას ეძახიან.

საქართველოს მდინარეები დაქანებულ ტერი-ტორიაზე მიმდინარეობენ. ამიტომ ისინი მეტად ჩქარი არიან და დიდი ჰიდრავლიური ძალის მოცემა შეუძლიათ.

მდინარისაგან მიღებული ელექტრონის ძალა იმდენათ იაფია, რომ მას სპეციალისტები უფასო ძალას უწოდებენ. მართლაც, ერთხელ რომ ჰიდრა-ლიურ სადგურს მოაწყობთ და ფულს დახარჯავთ, მერე მისი ასამუშავებელი და შესანახი ხარჯები იმ-დენათ მცირეა, რომ შემოსავალთან შედარებით ან-გარიშათაც არ ღირს.

მერე არ იკითხავთ, რამდენი ძალის მოცემა შეუძლია ჩვენს მდინარეებს.

საქართველოს მდინარეების მინიმალურ ენერ-გიას ინჟინერები 2 ნახ. მილ. ცხენის ძალათ ითვლიან.

ერთი ცხენის ძალა კი ათი მუშის ძალას უდ-რის. ე. ი. ჩვენი მდინარეები თავის თავში ინახავენ 25 მილ. მუშის ძალას.

25 მილიონი უსასყიდლო მუშა!.

მთელი ამ ძალის გამოყენება მრეწველობაში და სასოფლო მეურნეობაში რაღაც საზღაპრო რა-მეს შექმნიდა საქართველოში.

ჯერ-ჯერობით კი ამ კოლოსალურ ბუნებრივ სიმდიდრიდან მარტო 5 ათასი ცხენის ძალა არის გამოყენებული.

პირველი კონცესია დიდი ჰიდრავლიური სად-გურის ასაშენებლათ რუსეთის მთავრობამ 1912 წ. 2 ნოემბერს მისცა ინგლისის ქვეშევრდომს ინჟე-ნერ სტიუარტს.

უკანასკნელის მაგალითს სხვებმაც მიბაძეს და მრავალი მთხოვნელი მიანყდა კავკასიის ნამესტნიკს. ამაში ნებაართვა მიიღო მხოლოდ კომპ. ურბანოვიჩ-პალაშკოვსკისამ მდინარე რიონის ნაწილის გამოსაყე-ნებლად ჭიათურაში ელექტრო მეტალურგიული წარ-მოების გასამართავად.

მარა არც ერთი ეს კონცესია არ განხორციელებულა. და ეს ბუნების ძვირფასი სიმდიდრე დღემდე ტყუილად იკარგება.

ჩვენი მდინარეების ერთი დამახასიათებელი თვისება იმაში მდგომარეობს, რომ პატარა მანძილზე ისინი დიდ ენერჯიას მოგვცემენ. ასე მაგალდითადა, ჩვენში არის:

6 პუნქტი, სადაც 10-დან 20 ათას ცხენ. ძალ. მიიღ-
19 „ „ 20 „ 50 „ „ „ „
12 „ „ 50 „ 100 „ „ „ „
და 7 „ რომელსაც 100 ათას ცხენის ძალაზე მეტის მოცემა შეუძლია.

მდინარეების ძალის გამოყენება ჩვენთვის, პირველ ყოვლისა, იმას ნიშნავს, რომ საქართველო სათბობ და სანათ მასალის მიღების მხრივ გარეშე ქვეყნებზე არ იქნება დამოკიდებული. ბაქოს ნავთი, ურომლისოდაც ამ უამათ ჩვენ ერთ დღესაც არ შეგვიძლია არსებობა, ჩვენთვის საჭირო აღარ იქნება. ჩვენი მდინარეები იმდენ მამოძრავებელ ძალას იძლევიან, რამდენის მისაღებად საჭირო იქნებოდა წლიურათ თითქმის 700 მილიონი ფუთი ნავთის დაწვა.

ხშირათ ვნატრობთ – ბაქოს რა დიდი სიმდიდრე აქვსო და იმას ვერ ვამჩნევთ, რომ არა ნაკლები სიმდიდრე გვაქვს ჩვენი მდინარეების სახით შინ მოუხმარებლათ.

თუ რა დიდი სიკეთის მოცემა შეუძლია წყლების ძალის გამოყენებას – ეს სხვათაშორის, იქიდან ჩანს, რომ ნორვეგია-შვედის მრეწველობა და ეკონომიური სიძლიერე თითქმის სავსებით ბუნების ამ ძალის მოხმარებაზეა დამყარებული.

ზემოთ მოყვანილი ციფრების მნიშვნელობა კიდევ უფრო ცხადი იქნება ჩვენთვის, თუ გავითვალისწინებთ იმას, რომ 1914 წელს ინჟინერების გამონგარიშებით კავკასიის (მიიღეთ მხედველობაში მთელი კავკასიის და არა მარტო ამიერ-კავკასიის), ყველა ელექტრონის სადგურები (ბაქოს გამოკლებით) როგორც ჩვეულებრივი, ისე ჰიდრავლიური იძლეოდნენ არა უმეტეს 135 ათასი ცხენის ძალისა. წარმოიდგინეთ ახლა ერთ წამს, რა იქნებოდა, რომ საქართველომ თავის მდინარეების ჰიდრავლიური ძალის მარტო ერთი მესამედიც რომ გამო-

იყენოს.

ახლანდელი ჩვენი რკინის გზების ასამოძრავებლად საჭირო იქნება სულ რაღაც 50-60 ათასი ცხენის ძალა. ყველა ჩვენს სამრეწველო დაწესებულებებს დიდი-დიდი ამის ნახევარი ენერგია დასჭირდება. ქალაქების, დაბებისა და სოფლების გასანათებლათ, რაც უნდა ბევრი ვიანგარიშით, საკმარისი იქნება 100-120 ათასი ცხენის ძალა.

მარა იაფი ენერჯის ქონება თვით ინვესტორებს მრეწველობის განვითარებას. წარმოების ბევრი დარგი დღეს ვერ ხეირობს, იმიტომ რომ ძვირი ჯდება მისი მამოძრავებელი ძალით დაკმაყოფილება. წყლის ძალა ყველაზე უფრო იაფი ძალაა, და როგორც ასეთი, მაშასადამე, ის ხელს შეუწყობს წარმოების ახალ-ახალი დარგის აღორძინებას.

მართლაც, ჰიდროელექტრიული ძალის შემწობით, როგორც გაკვრით წინათაც მოვიხსენიეთ, ჩვენ შეგვეძლება ჭიათურის შავიქვის ფერომარგანცათ ქცევა, რაც მოასწავებს ქვეყნის სიმდიდრის გამრავლებას. საქართველოს მაშინ ამ დარგში მეტოქე არ ეყოლება მთელ დედამიწის ზურგზე.

მდინარეების ძალის მოხმარა საფუძვლათ დაედება ჩვენში მინის ხელოვნური სასუქის დამზადებას როგორც შინაური საჭიროების დასაკმაყოფილებლათ, ისე უცხოეთში გასატანათ. შეიძლება აღორძინდეს ქიმიური წარმოების სხვადასხვა დარგი, მაგალითად, შეიძლება დამზადება საღებავების, ასაფეთქებელ ნივთიერებათა – სელიტრის (ხელოვნური სასუქი), კალცის, კარბილის, ალიუმინის, ბერტოლეტის მარილის, ამიაკისა და სხვ.

მოეწყობა ელექტრონის ძალით გადადნობა რკინისა, სპილენძისა და სხვა მადნეულობისა.

ადვილი იქნება ისეთი ადგილების მორწყვა, რომელთაც ჩვეულებრივი სარწყავი სისტემა არ უდგება ან ძლიერ ძვირათ ჯდება. იაფი ენერჯის საშუალებით წყლის აყვანა მომალლო ადგილებზე მიღებით (насосами) ადვილია.

დაბოლოს, იაფი ენერგია ნიშნავს ელექტრონით ამუშავებას: რკინის გზების, ჰორტების, ფაბრიკების, ქარხნების, მალაროების; განათებას ქალაქების და სოფლების.

ერთი სიტყვით, დიდია სფერო ელექტრონის ენერჯის გამოყენებისა; დაუფასებელი მნიშვნელობა აქვს მას ქვეყნის საწარმოო ძალების განვითარების საქმეში, თუ მისი მიღება საკმაო რაოდენობით შეიძლება და ძვირიც არ ჯდება.

როგორც დავინახეთ, საქართველოს მდინარეები იძლევა აუარებელ იათ ენერჯიას, რომლის საგნებით დახარჯვას ვერასოდეს ვერ შესძლებს ჩვენი ქვეყანა, რა გინდ ძლიერ განვითარდეს ჩვენში მრეწველობა და სასოფლო მეურნეობა.

საქართველოს გეოგრაფიული მდებარეობა.

ჩვენს რესპუბლიკას აქვს ერთი დაუფასებელი სიმდიდრე, რომლის არც ხელის შეხება შეიძლება და არც ადვილათ გაზომვა. ეს – მისი გეოგრაფიული მდებარეობაა.

საქართველო მსოფლიო გზაჯვარედინზეა გაშენებული. ამას ახლაც ისეთი უდიდესი კულტურული და ეკონომიური მნიშვნელობა აქვს ერის ცხოვრებაში, როგორც წინეთ.

მართლაც, ჩვენ ვიცით, რომ წინანდელი ცივილიზაცია აღორძინდა იმ ქვეყნებში, რომლებიც ხმელეთისა თუ წყლის დიდი გზებით დაკავშირებული იყვნენ სხვა ქვეყნებთან, მიმოსვლა და ალემ-მიცემობა ქონდათ სხვა ერებთან. კარჩაკეტილი ხალხის ხვედრი ყოველთვის სისუსტე და ჩამორჩენა ყოფილა. ახლაც ასეა. ის ერი და საქართველო დღეს ვერ იარსებებს, რომელსაც ზღვაზე გასავალი არა აქვს და არ შეუძლია პირდაპირ კავშირი დაიჭიროს დანინაურებულ ქვეყნებთან. თითოეული დიდი სახელმწიფოს ისტორია არის ისტორია მსოფლიო გზების ხელში ჩაგდებისთვის ბრძოლისა. დიდი ერი და სახელმწიფო ამას ჩადიოდა პირველობის, ჰეგემონიის მოსაპოვებლათ, პატარა – თავის მდგომარეობის გასაუმჯობესებლათ და გასამტკიცებლათ.

როგორც კარგი ბინისათვის საჭიროა ფანჯარა სინათლისა და ჰაერის შესაშვებათ, ისე სახელმწიფოსთვის აუცილებელია თავისუფალი გზა და კავშირი განათლებულ კაცობრიობასთან. უიმისოდ ის ვერ გახდება თანამედროვე კულტურის მოზიარე და

ეკონომიური და გონებრივი პროგრესი მისთვის ხელ-
მიუნდომელი ხილი იქნება.

საქართველოს პატარა რესპუბლიკა არც ამ მხრივ
არის ბედისაგან დაჩაგრული.

იგი პირდაპირ აკრავს შავ ზღვას და უჭირავს
ორი კარგი ბოლაში: ფოთი და ბათომი. შავი ზღვის
შემწეობით ის პირდაპირ დაკავშირებულია ევროპა-
სა და ამერიკასთან.

მარა ეს კიდევ ცოტაა.

საქართველო აკავშირებს ევროპასა და აზიას.
ის ქვეყნის ამ ორი დიდი ნაწილის საზღვარზე ძევს.
იგი აღმოსავლეთის და დასავლეთის შუაგული ცენ-
ტრია. ამიტომ აქ ერთდება დიდი მსოფლიო გზები.
საქართველო შემაერთებელი ხილია დიდი და ატლან-
ტიის ოკეანესი, ცივ ოკეანესა და ხმელთაშუა ზღვის,
ინდოეთის ოკეანესა და ნემეცთა ზღვისა.

მრავალი ქვეყნის ვაჭრობა და აღებ-მიცემა სა-
ქართველოს საშვალეებით უნდა მოეწყოს. აქ უნდა
გამოიაროს სხვადასხვა ქვეყნის ნაწარმოებმა და
ხალხმა, რომ თავის მიზანსა და დანიშნულებას მი-
აღწიოს.

ბათომი და თბილისი მსოფლიო ვაჭრობის ერთ-
ერთი პუნქტია.

ამნაირათ საქართველო ხალხთა და ნივთთა დი-
დი მოძრაობის აუცილებელი მონაწილე ხდება.

ამიტომ ჰქონდა ჩვენთვის ასეთი დიდი მნიშვნე-
ლობა ბათომის გადმოცემის საკითხს. როცა დაიწყეს
ბათომ-ყარს-თავრიზის რკინის გზის შესახებ ლაპარა-
კი და ამის განხორციელება დაუკავშირეს ბათომის
ნეიტრალიზაციის საკითხს, მთელმა ერმა ინსტიქტიუ-
რათ იგრძნო, რომ მის არსებობას სამარეს უთხრი-
დენ და ისტორიული განვითარებისა და ეკონომიუ-
რი პროგრესის გარეშე სტოვებდენ.

მართლაც რაღა იქნებოდა საქართველო, თუ
აზია-ევროპის შემაერთებელი გზა მას განზე დატო-
ვებდა? რათ გადიქცეოდა ერთხანს შემდეგ თბილი-
სი – ეს საქონლის დიდი განმანაწილებელი ცენტრი,
თუ ამ საქონლის მოძრაობა მას ამორდებოდა?

დიახ, საქართველოს იშვიათი გეოგრაფიული
მდებარეობა მისი ერთი დაუფასებელი განძთაგანია,
რომელიც ხელს უწყობს მის ნივთიერ კეთილდღეო-

ბას და პირდაპირ მონაწილეთ ხდის თანამედროვე კულტურისა და განვითარების.

ამნაირათ ჩვენ დავინახეთ, რომ საქართველო თუმცა პატარა ქვეყანაა, მარა ყოვლად შემკული და ბუნებით მდიდარია. მას აქვს ყველაფერი, რაც საჭიროა სახელმწიფოს შესაქმნელათ და განსამტკიცებლათ. აკლია მხოლოდ ცოდნა და მიზანშეწონილი შრომა. ცოდნა ჩვენ უნდა შევიძინოთ და შრომას მივუძღვიოთ. ეს აუცილებელია. ქართველი ხალხი ამას შესძლებს. ამის თავდებია მისი როგორც შორეული, ისე ახლო წარსული და ის გმირული ბრძოლა, რომლის ცეცხლში მან უმნიშვნელოთ გამოატარა დემოკრატიისა და საკაცობრიო იდეალების დროშა.

მომავალ საზოგადოებას საქართველო უნდა შეხვდეს არა ღარიბი და სუსტი, არამედ ლაღი და მშვენიერი დიდი სულიერი და ნივთიერი კულტურით.

ამის შესაძლებლობას ჩვენი უთვალავი ბუნებრივი სიმდიდრე იძლევა.